

**EBBALUWA ESOOKA  
OYOKAANA  
EGIYAWANDIIKIRE  
Enyanjula**

Ebbaluwa ya *Yokaana* esooka, omutume oYokaana niye eyagiwandiikire aakati w'omwanka 50-100 nga bamalire okubyala oKurisito. OYokaana yawandiikire ebbaluwa eenu eeri baikirirya bonabona. OYokaana tiyeetoolayo nga niye omuwandiiki, neye empandiika omu bbaluwa eenu era kumpi efaanana n'empandiika eeri omu kitabo *aMawuliro aMasa ng'oYokaana oweyagawandiikire*. N'ekindi, ensuula esooka omu bbaluwa eenu eraga eti, omuwandiiki yaboineku obwomi era n'okuzuukira kwa Kurisito (1:1-3). N'olwekyo abantu abakira obungi baikikirirya bati oYokaana niye yawandiikire ekitabo ky'aMawuliro aMasa, n'ebbaluwa eisatu egiriku eriinalye, era bati yagiwandiikire ng'ali mwEfeeso.

Ekigendererwa kya Yokaana omu kuwandiika ebbaluwa eenu, kyabbaire kutaka kukubiriza baikirirya babbe n'enkolagana ensa aakati waabwe n'oKibbumba aamo n'oMwanawe oYesu Kurisito. OYokaana yawandiikire ebbaluwa eenu, omu kiseera ekanisa oweyabbaire n'obugosi okuzwa eeri ekibbula ky'abantu abebeeta bati "Bagonositiki." Abantu abo babbaire baikirirya bati, oYesu yabbaire nakimo

Kibbumba neye bati tiyabbaire dala muntu aali n'omubiri oguli n'omusaaye ng'ali oku kyalo. N'olwekyo oYokaana awandiika ekikwata kwiye okubba omujulizi eyaboineku n'amaiso obwomi bwa Yesu, era ati engalogye gyakwaite oku Yesu (1:1-3).

### **Engeri egibyecaanamu**

1. Okwanjula (1:1-4).
2. OKibbumba kitangaala (1:5-3:10).
3. Ekiragiro ky'okutakangananga (3:11-5:12)
4. Ebibono ebisembayo (5:13-21).

### *EKibono eky'obwomi*

<sup>1</sup> Mbawandiikira ku yooyo ogubeeta oKibono iye onanzwa w'obwomi. Iye oyo nago eyabbairewo okuzwera nakimo eira omu kubbumba ekyalo. Era oyo iswe banu ogutwawulisisiryeku, era ni tumubonaku n'amaiso gaiswe, era ni tumwekalikica era n'okumukwataku ni tumukwataku n'engalo gyaiswe. Ekikoba kiti oyo, iswe banu ogutulaabba.

<sup>2</sup> Era oyo iye nago onsulo wa bwomi oweyaikire oku kyalo kunu, twamuboine era iswe tumwijululaku era gutuli kulaabba egimuli tuti iye niiye agaba obwomi obutawaawo. Cooka iye enyumaku eedi, yeebbeeranga giri Iteeye, neye yairire n'aiza yeeragisya egituli.

<sup>3</sup> Kale tulaabba egimuli ku yoodi ogutwaboineku era ogutwawulisisiryeku, kaisi olwo nywena mwezye okubba n'enkolagana na iswe nga swena owetuli naiyo n'oKibbumba iye

oTewaiswe aamo naye nago oMwanawe oYesu Kurisito.

<sup>4</sup> Era ebyo tubibawandiikira kaisi olwo eisan-gaalo lyaiswe\* libbe mu bwizulye.

*OKibbumba ayaka ooti kitangaala*

<sup>5</sup> Kale obukwenda owetwawuliire okuzwa egiri oYesu Kurisito, era obutulaabba egimuli niibwo bunu buti: OKibbumba ayaka ooti kitangaala era egyabba tiwabbakuwo kandikiirya kadi katyayi kati.

<sup>6</sup> N'olwekyo singa owetukoba tuti tuli n'enkolagana aamo n'oKibbumba kaisi tete ni twira kukolanga bikole ebibbibbi ebiraga endikiirya, awo-so tubba babbeyi, era tubba titukolera ku mazima ga Kibbumba.

<sup>7</sup> Neye owetutambulira omu kitangaala ooti kiikyo oKibbumba ekyayaka, mwiswe tubba tulimu n'enkolagana eyaiswe aamo, era omusaaye gwa Yesu iye oMwanawe, igwo gwaba nga gutunaabyaku nabuli kibbikibbi.

<sup>8</sup> N'olwekyo, singa owetukoba tuti tubula ekib-bikibbi omu myoyo gyaiswe, tubba tubbeyesya, era nga tubulamu n'amazima.

<sup>9</sup> Neye owetubbutula tuti tuli n'ekibbikibbi, iye oKibbumba mwesigwa era iye tiyeekubbira era atusoniya, era n'atusuuga abakenene okuzwa omu by'obutali butuukirirye.

<sup>10</sup> Era singa owetukoba tuti titukolangaku ekikole ekibbikibbi, tubba tusuucirye oKib-bumba mubbeyi, era nga n'ekibonokye kibula omu bwomi bwaiswe.

---

\* **1:4 1:4** Ooba, *Lyanywe*.

## 2

### *OKurisito atubbeera*

<sup>1</sup> Kale inywe baana bange abatake, binu mbibawandiikiire kaisi olwo mubbe nga timukola ebikole ebibbibibbi. Neye owewabbaawo akola ekikole ekibbikibbi, tuli n’oyo iye atuwozererya eeri oItewaiswe, ekikoba kiti, iye oYesu Kurisito nago atuukirire.

<sup>2</sup> Era okufa kwa Kurisito oyo niigwo omugaito ogw’okutusoniya ebibbibibbi byaiswe; kaisi nga tibyaiswe byonkani, neye n’eby’abantu bonabona oku kyalo.

<sup>3</sup> Era owetugondera ebiragiyo bya Kibbumba, okwo kututegeereraku nga dala tumumaite.

<sup>4</sup> Kale omuntu owaakoba ati, “Nze dala mmaite oKibbumba,” neye tete iye oyo n’ajeemera ebi-ragiroye, abba mubbeyi, era abba abulamu amazima.

<sup>5</sup> Neye singa omuntu yenayena atuukirirya ekibono kya Kibbumba, mazima omuntu oyo abba n’okutaka okwizulye okuzwa egiri oKib-bumba. Era engeri egitumanyiciryaku tuti tuli n’enkolagana naye niiye eti:

<sup>6</sup> Buli akoba ati ali n’enkolagana n’oKibbumba, atekwa okwebitya ooti Kurisito oweyebityanga.

### *Ekiragiyo ekiyaaka*

<sup>7</sup> Kale inywe bainange abatake, tindi kubawandiikira ku kiragiyo kiyaka, neye ku kiidi ekimuwuliranga, ikyo nago ekimwawuliire okuzwera nakimo owemwaikiriirye. Ekiragiyo

eky'eira ekyo nago, niibwo obukwenda obumwabire nga muwulira.

<sup>8</sup> Wazira era ekiragirowo ekimbawandiikiraku kirimu obuyaaka, era amazima gaakyo gabonekera mu bwomi bwa Kurisito n'omu bwanywe. Ekyo kityo olw'okubba ebikole ebibbibibbi ebiri ooti by'omu ndikiirya biri kuwaawo, era ebikole ebisa ebiri ooti kitangaala ekinanyerenyeere atyanu niibyo ebiri kubbangawo.

<sup>9</sup> Kale iye oyo akoba ati atambulira omu nkola ya Kibbumba ensa eri ooti kitangaala, kaisi n'abba ng'acaawa owoluganda, abba akaali ali mu ndikiirya.

<sup>10</sup> Neye iye oyo ataka owoluganda, abba atambulira mu nkola ya Kibbumba ensa eri ooti kitangaala era iye oyo abba abulamu ekyesitaalisya owoluganda.\*

<sup>11</sup> Cooka iye oyo acaawa owoluganda, abba akaali alimu ebikole ebibbibibbi ooti muntu atambulira omu ndikiirya era atamaite egyayaba, olw'okubba endikiirya ebba emwigaire amaiso.

<sup>12</sup> Kale inywe omwankaikirirya era abaana abatake, mbawandiikira olw'okubba ebibbibibbi byanywe babibasoniyire olwa Yesu.

<sup>13</sup> Era mpandiikira inywe omukulire omu kwikirirya, olw'okubba atyanu dala mumaite oyo eyabbairewo okuzwera nakimo olusooka. Era mpandiikira inywe omuli n'eiganyi ooti baisuka, olw'okubba mugaine oMubbimubbi. Era mpandiikira inywe omwankaikirirya era

---

**2:7 2:7** Yok 13:34

\* **2:10 2:10** Ooba, *Ekimwesitaalisya iye onyere.*

omuli ooti baana abatake, olw'okubba mwalire dala okumanya oItewaiswe.

<sup>14</sup> Era mpandiikira inywe omukulire omu kwikirirya, olw'okubba atyanu dala mumaite oyo eyabbairewo okuzwera nakimo olusooka. Era mpandiikira inywe omuli n'eiganyi ooti baisuka, olw'okubba muli b'amaani omu bwomi bw'omwoyo, n'ekibono kya Kibbumba kibalimu, era muwangwire oMubbimubbi.

<sup>15</sup> N'olwekyo timubbanga n'okwegomba enkola embiibbi ey'oku kyalo kunu, waire ebintu ebitali bisa ebiri omu bantu, olw'okubba iye oyo ataka ebikole ebibbibbi ebiri oku kyalo, tabba n'okutaka oItewaiswe.

<sup>16</sup> Ekyo kityo olw'okubba iyo enkola y'ekyalo ikwo kululunkanira biibyo omubiri ekigwegomba kwereere, n'okwegomba buli kintu amaiso ekigabona, n'okwewaana olw'ebintu ebitubba tusunire aamo n'ebitubba tukolere. Cooka ebintu ebyo byonabyona tibizwa giri Itewaiswe, neye bizwa mu kyalo munu.

<sup>17</sup> Era ekyalo nago kiwerawo aamo nabuli kintu abantu ekibegomba. Neye iye oyo akola ekyo oKibbumba ekyasiima, wakubbaawo emirembe n'emirembe.

### *Omulabe wa Kurisito*

<sup>18</sup> Kale inywe omuli ooti baana abatake, ekiseera ky'enkomerero owekiri awo kituukire. Era ng'owemwawuliire muti omulabe wa Kurisito aiza, cooka n'atyanu waliwo abalabe ba Kurisito bangi. Kale kwekyo niikwo okutumanyiciryaku tuti ekiseera ekisembayo owekiri awo kituukire.

19 Kaisi abalabe abo nago twakumbaananga nabo, neye tibabbaire b'enjikirirya ooti yaiswe. Ekyo kityo olw'okubba singa babbaire b'enjikirirya eedi eyaiswe, bandibbaire basigala na iswe. Neye kale okutuzwaku kwabwe kwalagire kuti mpaawo kadi moiza kwibo eyabbaire omunaiswe.

20 Neye inywe oKurisito yabawaire oMwoyo oMutukulye, era inywe nywenanywena mu-maite amazima.

21 Kale timbawandiikira olw'okubba kiti timu-maite amazima, neye olw'okubba mugamaite era n'olw'okubba nti mpaawo bubbeyi obuzwa omu mazima.

22 Kale olwo omubbeyi niye aliina? Niye oyo agaana okwikirirya ati oYesu niye oKurisito. Era iye oyo niye omulabe wa Kurisito, ekikoba kiti, taikirirya ati oKibbumba Iteeye wa Yesu.

23 Era mpaawo iye agaana okwikirirya oMwana wa Kibbumba kaisi n'aikiriryaku oIteeye. Kale iye oyo abbutula ati aikirirya oMwana wa Kibbumba, abba aikirirya n'oKibbumba oIteeye.

24 N'olwekyo inywe muteekwa okubona muti ekyo ikyo ekimwawuliire okuzwera omu ku-sookesya, kibasigalamu. Kale ikyo ekyo owek-ibba kityo, inywe nywena mwalisigala nga muli omu nkolagana n'oMwana n'oIteeye.

25 Era kinu niikyo oKurisito ekiyatusuubizire, obwo nga niibwo obwomi obutawaawo.

26 Kale ndi kubawandiikira ebintu binu kubal-abula ku bantu abo abagezyaku okutaka okubali-ibya.

<sup>27</sup> Neye inywe, oMwoyo oMutukulye oKurisito oguyabawaire, akaali ali mwinywe, era timwe-taagisya muntu yenayena kubeegesya. Ekyo kityo olw'okubba oMwoyo oyo nago abeegesya byonabyona ibyo ebinanyerenyeere, era tibinambulamu naire. Kale mubbenge mu nkolagana n'okurisito, ng'oMwoyo oyo nago oweyabeege-serye.

<sup>28</sup> Aale atyanu, inywe omuli ooti baana abatake, mubbenge omu nkolagana n'okurisito. Awo oweyaliboneka omu kwizakwe kaisi olwo twezeye okubba bagumu, era n'okutaswala omu-maisoge.

<sup>29</sup> Kale, singa owoomanya oti iye atuukirire era obba oli n'okumanya oti buli akola ebyo ebituuce abba mwana wa Kibbumba.

### 3

#### *Abaana ba Kibbumba*

<sup>1</sup> Aale mubone okutaka okwo okw'amaani oItewaiswe okweyatutakiremu. Era olw'okutakakwe okwo okw'amaani atweta baanabe, era kaisi dala niiye owetuli. Ekgira abantu abo abatambulira omu mpisa gy'ekyalo nandi ni batutegeera, olw'okubba yena tibamutegeire.

<sup>2</sup> Kale bainange abatake, atyanu tuli baana ba Kibbumba, waire wona era ng'ekitwalibba kikaali okumanyikana. Cooka tumaite tuti oweyaliboneka, twalifaanana ooti niiye, olw'okubba twalimubona dala ng'obwali.



<sup>3</sup> Era buli muntu aali n'eisuubi eeryo omu Kurisito, yeetukulyenge n'abba mukenene omu bwomi bw'omwoyo ng'oKurisito obwali omukenene.

<sup>4</sup> Era buli eyeeyongera okukola ekibbikibbi, abba ajeemeire oKibbumba, olw'okubba ekibbikibbi niibwo obujeemu.

<sup>5</sup> Neye mukimaite muti oKurisito yaizire kutoolawo omusango gw'ekibbikibbi, era nga mwiye mpaamu kikole ekibbikibbi.

<sup>6</sup> Buli muntu abba omu nkolagana naye, tiyeeyongera kukola kibbikibbi. Era buli eyeeyongera okukola ekibbikibbi, oyo abba tategeerangaku ooba tamanyangaku oKurisito.

<sup>7</sup> Kale inywe omuli ooti baana abatake, timuganyanga muntu yenayena okubagotesya. Iye oyo akola ebituukirirye, abba mutuukirirye ooti Kurisito obwali mutuukirirye.

<sup>8</sup> Era iye oyo akola ekikole ekibbikibbi, oyo abba wa Sitaani, olw'okubba okuzwera nakimo eira omu kubbumba ekyalo oSitaani mukoli w'ebikole ebibbibbi. N'olwekyo iye oMwana wa Kibbumba kiyazwireku aize ajigirice ebikole bya Sitaani.

<sup>9</sup> Cooka omuntu oyo asuuka omwana wa Kibbumba tiyeeyongeranga-bweyongeri omu bikole ebibbibbi. Ekyo kityo olw'okubba ekikula ky'obwomi bwa Kibbumba kibba kiri omu omuntu oyo, era tayezya kweyongera kukola bikole ebibbibbi olw'okubba oKibbumba abba niye eyamubyaire.

<sup>10</sup> Era ekitumanyiciryaku abaana ba Kibbumba n'aba Sitaani niikyo kinu ekiti: Buli muntu atakola ebyobutuukirirye, waire yooyo atataka owoluganda, iye oyo abba timwana wa Kibbumba.

### *Mutakanganenge*

<sup>11</sup> N'olwekyo, obukwenda obumwasunire okuzwera nakimo owemwaikiriirye niibwo bunu obuti: Tuteekwa okutakangananga.

<sup>12</sup> Era timubbanga ooti Kaini, iye oyo eyabaire owa Sitaani, era n'aita omugandawe. Neye ekyo kyazwire kuuki? Yamwitire olw'okubba ebikole ebibye iye oKaini byabaire bibbibbi, kaisi ebya mugandawe nga ibyo bisa.

<sup>13</sup> Kale boluganda, timwewunyanga singa abantu b'oku kyalo ibo owebabacaawanga.

<sup>14</sup> Cooka iswe tumaite tuti twazwire omu kufa, ni twingira omu bwomi olw'okubba tutaka aboluganda. Era iye oyo abula okutaka abba akaali ali mu kufa.

<sup>15</sup> Kale nabuli muntu acaawa omwinaye, abba mwiti, kaisi aate nga mumaite muti mpaawo mwiti ali n'obwomi obutawaawo omunda mwiye.

<sup>16</sup> Era ekitutegeereraku okutaka niikyo kinu ekiti: OYesu Kurisito yawaireyo obwomibwe okulwaiswe. Kale swena tuteekwa okuwaayo obwomi bwaiswe oku lw'aboluganda.

<sup>17</sup> Era singa omuntu abba n'ebyobusuni eby'oku kyalo kunu kaisi n'amanya owoluganda ng'ali omu kudamba neye nandi

n'amubbeeraku, omuntu oyo ayezya atya okubba n'okutaka oKibbumba?

<sup>18</sup> Kale inywe omuli ooti baana abatake, tuleke okutumulanga-butumuli kyonkani tuti tuli n'okutaka, neye tukolenge n'ebikole ebiraga biti mazima tuli nakwo.

<sup>19</sup> Awo olwo omu ngeri eyo, niikwo oku twa-tegeereraku tuti tuli n'amazima ga Kibbumba, era n'okugumya emyoyo gyaiswe omumaisoge,

<sup>20</sup> singa owegibba gitulumiriza. Ekyo kityo olw'okubba oKibbumba iye akiraku ino emyoyo gyaiswe okumanya, era iye amaite nabuli kintu.

<sup>21</sup> Kale bainange abatake, singa emyoyo gyaiswe owegibba giti tigitulumiriza, tubba bagumu omu kusaba oKibbumba,

<sup>22</sup> era ni tusuna nabuli kitumusaba, olw'okubba tukwata ebiragiroye, era ni tukola ebyasiima.

<sup>23</sup> Era ekiragirokye niikyo kinu ekiti: Okwikiririrya omu liina ly'oMwanawe oYesu Kurisito, era n'okutakangananga ng'oKurisito oweyatulagiire.

<sup>24</sup> Kale bonabona abakwata ebiragiroye bya Kibbumba babba n'enkolagana naye era yena abba kintu kimo nabo. Era ekitutegeereraku tuti ali omu myoyo gyaiswe niikyo kinu ekiti: Tukimanyicirya ku Mwoyowe oguyatuwaire.

## 4

*OMwoyo ow'amazima era n'oodi ow'obubbeyi*

<sup>1</sup> Kale bainange abatake, timwikiriryanga nabuli mwoyo, neye mugezyenge emyoyo kaisi mwezye okubona obanga gizwa giri Kibbumba, olw'okubba abanaabbi bangi ab'obubbeyi basalaanikiire omu kyalo.

<sup>2</sup> Era engeri egyotegeereraku oMwoyo wa Kibbumba niye eenu eti: Nabuli muntu abbutula ati oYesu Kurisito yaizire ng'omuntu, oyo abba aliku oMwoyo wa Kibbumba.

<sup>3</sup> Neye buli muntu agaana okubbutula ekyo oku Yesu Kurisito, abba aliku mwoyo ogutazwa giri Kibbumba. Era ogwo nago niigwo omwoyo gw'omulabe wa Kurisito. Cooka mwawuliire muti gwiza, era n'olwatyano guli omu kyalo.

<sup>4</sup> Kale inywe abali ooti baana abatake, muli bantu ba Kibbumba era mumalire okuwangula abanaabbi b'obubbeyi nago olw'okubba oKibbumba oyo iye aali mwinywe akiraku ino oSi-taani iye aali omu bantu abataka eby'ekyalo.

<sup>5</sup> Ibo abanaabbi abo nago tibaikirirya oKibbumba era batumula by'ekyalo, era kagira ebibeegesya, ibo abantu abataikirirya babawulisya.

<sup>6</sup> Cooka iswe tuli bantu ba Kibbumba era iye oyo aali n'enkolagana n'oKibbumba, awulisya ebitwegesya. Neye iye oyo atali wa Kibbumba, tabiwulisya. Era eyo niyo engeri egitutegeereraku oMwoyo ow'amazima n'omwoyo ow'obubbeyi.

### *Enkola ya Kibbumba iyo kutaka*

<sup>7</sup> Kale bainange abatake, aale tutakanganenge olw'okubba okutaka kuzwa giri Kibbumba. Era

buli muntu ataka omwinaye, abba mwana wa Kibbumba, era ali n'enkolagana n'oKibbumba.

<sup>8</sup> Cooka iye oyo atataka omwinaye, abba abula enkolagana n'oKibbumba olw'okubba enkola ya Kibbumba iyo kutaka.

<sup>9</sup> Era engeri oKibbumba egiyalagiremu ng'owatutaka niiyo eenu eti: Yatumire omu kyalo oMwanawe era oMwanamoiza, kaisi tubbe n'obwomi obutawaawo olw'oMwana nago.

<sup>10</sup> Era okutaka tikitegeeza nti iswe niiswe otwatakire oKibbumba, wazira iye niiye eyatutakire, era n'atuma oMwanawe okubba omugaito ogw'okuwaayo olw'ebibbibbi byaiswe.

<sup>11</sup> Kale bainange abatake, ng'oKibbumba oweyatutakire atyo, na iswe swena tuteekwa okutakangananga.

<sup>12</sup> Cooka mpaawo abonangaku oKibbumba; neye owetutakangana, oKibbumba abba kintu kimo na iswe, era okutakakwe mwiswe kubba kwizulye.

<sup>13</sup> Kale tumaite tuti tuli n'enkolagana n'oKibbumba, era nga yena obwali ekintu ekimo na iswe olw'okubba yatuwaire oMwoyowe.

<sup>14</sup> Era iswe twaboine era tukobera abandi tuti otewaiswe yatumire oMwanawe okulokola abantu oku kyalo.

<sup>15</sup> N'olwekyo singa omuntu yenayena abbutula ati oYesu niiye oMwana wa Kibbumba, asuna enkolagana n'oKibbumba era oKibbumba yena abba kintu kimo n'omuntu oyo.

<sup>16</sup> Kale era iswe tumaite era twesigire kutaka oKibbumba okwatutakamu.

Cooka oKibbumba ikwo kutaka, era oyo iye ataka oKibbumba n'aboluganda abba n'enkolagana n'oKibbumba, n'oKibbumba yena abba kintu kimo n'omuntu oyo.

<sup>17</sup> Mwekyo okutaka kubba kwizulye mwiswe, kaisi tubbe bagumu oku lunaku olw'okusaliraku omusango olw'okubba obwomi bwaiswe buli ooti bwa Kurisito ng'oweyeebityanga oku kyalo kunu.

<sup>18</sup> Kale oKibbumba ogwataka tabba n'okutya. Era okutaka okutuuce kumalawo okutya olw'okubba omuntu ali n'okutya lwa kusuubira kibonerezo, era oyo iye aatya abba okutaka kwa Kibbumba tikwizulye omu mwoyogwe.

<sup>19</sup> Kale iswe tutaka oKibbumba olw'okubba oKibbumba niiye eyasookere okututaka.

<sup>20</sup> Era singa omuntu owaakoba ati, "Ntaka oKibbumba," neenu ng'acaawa owoluganda, abba mubbeyi. Ekyo kityo olw'okubba iye oyo atataka omuntu ogwayezya okubonaku, abba tayezya okutaka oKibbumba iye ogwatabonangaku.

<sup>21</sup> Era oKibbumba yatuwaire ekiragiyo kinu ekiti: Nabuli iye oyo ataka oKibbumba, atekwa era n'okutaka owoluganda.

## 5

### *Ekigira ni tuwangula ekyalo*

<sup>1</sup> Kale nabuli aikirirya ati oYesu niiye oKurisito ogubasukireku amafuta, iye oyo abba mwana wa Kibbumba, era nabuli ataka omubyaire, ataka n'omwana w'omubyaire oyo.

<sup>2</sup> Era engeri egitumanyamu tuti tutaka abaana ba Kibbumba niyo eenu eti: Mukutakanga Kibbumba era n'okukwatanga ebiragiroye.

<sup>3</sup> Mazima okutaka oKibbumba niikwo kunu okuti: Okuwulira ebiragiroye. Kaisi era n'ebiragiroye nago tibikalanguki ino,

<sup>4</sup> olw'okubba nabuli mwana wa Kibbumba, awangula enkola embiibbi ey'oku kyalo kunu. Era ekigira ni tuwangula enkola embiibbi ey'oku kyalo kunu, niikyo olw'okubba nti twikiririrya omu Kurisito.

<sup>5</sup> Kale naani oyo iye ayezya okuwangula enkola embiibbi ey'oku kyalo kunu? Niiye oyo yenkani aikirirya ati oYesu niiye oMwana wa Kibbumba.

*Abajulizi abatumula oku Yesu Kurisito*

<sup>6</sup> OYesu Kurisito niiye oyo eyaizire oku kyalo kunu mu kubita mu Yokaana kumubatiza mu maizi n'omu kufa ng'asuka omusaayegwe. Tikumubatiza mu maizi kyonkani, wazira bamubazitire omu maizi era n'afa ng'asuka omusaaye. Era iye oMwoyo oMutukulye niiye akakasa ati kinu kya mazima, olw'okubba oMwoyo oMutukulye atumula mazima.

<sup>7</sup> Ekyo kityo olw'okubba waliwo obujulizi obw'emirundi misatu obuti:

<sup>8</sup> OMwoyo oMutukulye, n'okumubatiza omu maizi, n'okufa ng'asuka omusaaye, era ebintu ebyo byonabyona ebisatu bikakasa kimo ekyo.

<sup>9</sup> Cooka twikirirya abantu ebyo ebibakakasa, neye ebyo ibyo oKibbumba ebyakakasa bibba bikiraku obwesigwa olw'okubba oKibbumba abba niiye akakasire ebikwata oku Mwanawe.

<sup>10</sup> Kale nabuli aikiririrya omu Mwana wa Kibbumba, abba ali n'obukakafu obwo omu mwoyogwe. Era iye oyo ataikirirya oKibbumba ebyakoba abba asuucirye oKibbumba okubba omubbeyi olw'okubba abba taikirirya ebyo oKibbumba ebyakakasa oku Mwanawe.

<sup>11</sup> OKibbumba akakasa ati yatuwaire obwomi obutawaawo, era obwomi obwo tubusuna kubita mu Mwanawe.

<sup>12</sup> Kale iye oyo aali n'enkolagana n'omwana wa Kibbumba, ali n'obwomi; era iye oyo abula enkolagana n'omwana wa Kibbumba, abula obwomi.

### *Obwomi obutawaawo*

<sup>13</sup> Kale mbawandiikira oku bintu binu, inywe abaikiririrya omu liina ly'omwana wa Kibbumba kaisi mwezye okumanya muti muli n'obwomi obutawaawo.

<sup>14</sup> Era obugumu obutuli nabwo nga tusaba oKibbumba niibwo bunu obuti: Singa owetumusaba ekintu kyonakyoona ekiri omu kusiimakwe, atuwulira.

<sup>15</sup> Era owetutegeera tuti owetumusaba atuwulira, awo tubba tumaite tuti atuwa ebitumusaba.

<sup>16</sup> Singa omuntu yenayena owaabona owoluganda ng'akola ekikole ekibbikibbi ekitazweremu woluganda oyo kufa, amusabirenge era oKibbumba yaliwa owoluganda oyo obwomi. Ndi kutumula ku baabo abakola ekikole ekibbikibbi ekitabazweramu ibo kufa. Neye waliwo ekibbikibbi ekizweramu muntu kufa. Ekyo tiniikyoo



ekintumulaku owenkoba nti oli n'okusaba lwa kiikyo.

<sup>17</sup> Cooka ekikole kyonakyoona ekitali kisa, kikole kibbikibbi, neye era waliwo ekikole ekibbikibbi ekitazweramu muntu kufa.

<sup>18</sup> Era tumaite tuti omuntu yenayena iye abba asuukire omwana wa Kibbumba tasigala ng'akola ebikole ebibbibbi olw'okubba oYesu oMwana wa Kibbumba amukuuma n'akusa, era oSitaani n'atamukola akabbikabbi.

<sup>19</sup> Tumaite tuti tuli baana ba Kibbumba, era tuti ibo abakola ebibbibbi oku kyalo bonabona bali mu bwezye bwa Sitaani.

<sup>20</sup> Era tumaite tuti oYesu oMwana wa Kibbumba yaizire era n'atutegeeresya, kaisi twezye okumanya oKibbumba iye oyo ow'amazima. Era tuli n'enkolagana n'oyo iye ow'amazima, tete ni tubba n'enkolagana n'oMwanawe oYesu Kurisito yena. Iye oyo nago niiye ogututegeereraku oKibbumba ow'amazima, era niiye agaba obwomi obutawaawo.

<sup>21</sup> Kale inywe omuli ooti baana abatake, mwe-walenge okusinza ebifaananyi.

**ENdagaano eMpyaka oMu Lugwere**  
**Gwere: Endagaano Empyaka Omu Lugwere (Bible)**

copyright © 2017 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2025-05-03

---

PDF generated using Haiola and XeLaTeX on 2 May 2025 from source files  
dated 3 May 2025

03698e2d-9c8d-5b1f-bc49-b0066e860180